





謝宣城集序



宣城集舊十卷宋以後止傳其詩賦五卷其五卷者皆當時雜文不如詩故不傳也劉侯知武功之二年一日來許西別業見宣城集歎曰古之言詩者以曹劉鮑謝今曹鮑刻本矣顧獨無劉謝幸親與見謝今已不刻如後世絕之者自余為何刻成予撫卷太息曰嗟乎宣城詩盛傳於當時及於後世且千有百年也由昭代以來且百有數十年也亦莫不咸愛其詩思見其集顧奚無一人刻彼豈弗知不愛也利私見夸耀掩昧希乏為勝爾本即多差謬隨王鼓吹曲與樂府所載頗異他何可言哉或曰此集本或其質直蓋不然自開成以來詩人務以竒靡鑽研為巧雖當

世名作如李杜弗學之矣又安肯軼代越世哉故雖刻本亦少好古之士或往往抄錄備種數爾固無由不謬也劉侯名紹字繼先濮人正德辛未六月庚辰武功康海序

謝眺字玄暉宋僕射景仁之孫少有美名齊隨王子隆以為文學未幾求還都除新安王記室尋兼尚書殿中郎宣城王鸞輔政以為驃騎諮議掌中書詔誥轉中書郎出補宣城太守後遷至吏部郎兼衛尉永元初江柘謀立始安王遙光引以為黨不從收下獄死年三十六

謝宣城集序

謝眺集目錄

卷第一

賦凡九首

酬德賦并序

七夕賦

杜若賦

遊後園賦

擬宋玉風賦

樂歌


雩祭歌八首

迎神

三言八章

世祖武皇帝

四言三章



青帝 三言三章

黃帝 五言三章

黑帝 六言三章

詩 四言凡三首

赤帝 七言三章

白帝 九言三章

送神 三言五章

侍宴華光殿曲水奉敕為皇太子作

三日侍宴華光殿曲水代人應詔

三日侍宴曲水代人應詔

卷第二

雜曲 凡四十三首

隋王鼓吹曲十首

元會曲

郊祀曲

鈞天曲 右三曲頌帝功

入朝曲

出藩曲

校獵曲 右三曲頌藩德

從戎曲

送遠曲

登山曲

泛水曲 右四曲

同沈右率諸公賦鼓吹曲名 凡十一首

芳樹 三首

當對酒

臨高臺 二首

巫山高 三首

有所思 二首

同江檀諸人賦雜曲名 凡二十一首

陽春曲

淶水曲

採菱曲

白雪曲

秋竹曲

永明樂 十首

玉階怨

金谷聚

王孫遊

銅爵怨

江上曲

曲池之水

同謝諮議詠銅爵臺

卷第三

雜詩

五言凡四十三首

將發石頭上烽火樓

荅王世子

荅張齊興

荅王晉安

暫使下都夜發新林至京邑贈西府同僚

始出尚書省

直中書省

觀朝雨

新亭渚別范零陵雲

之宣城郡出新林浦向板橋

始之宣城郡

宣城郡內登望

冬日晚郡事隙

後齋迴望

落日悵望

望三湖

遊山

賽敬亭山廟喜雨

祀敬亭山廟

遊敬亭山

賦貧民田

與江水曹至濱干戲

送江曹還遠館

送江兵曹檀主簿朱孝廉還上國

臨溪送別

將遊湘水尋句溪

忝後湘州與宣城吏民別

休沐重還丹陽道中、移病還園示親屬

出下館 遊東田

秋夜講解 秋夜

春思 治宅

冬緒羈懷示蕭諮議虞田曹劉江二常侍

懷故人 夜聽妓 二首

京路夜發 晚登三山還望京邑

高齋視事 郡內高齋間望蒼呂法曹

卷第四

雜詩 凡四十六首

和蕭中庶直石頭 直石頭 梁武帝

奉和竟陵王同沈右率過劉先生墓

登山望雷居士精舍同沈右衛過劉先生墓下作

竟陵王 蕭子良 經劉瓛墓下 隨郡王蕭子

虞炎奉和 柳惲奉和

沈約奉和 離夜 江丞王 常侍附

和沈右率諸君 沈虞諸人餞詩附

和王長史臥病 王臥疾詩

和沈祭酒行園 沈行園附

和江丞北戍瑯琊城 江丞附

和徐都曹出新亭渚 徐詩附

和劉中書入琵琶峽望積布磯劉詩附

在郡臥病呈沈尚書沈荅詩附

和何議曹郊遊二首 和劉西曹望海臺

和王中丞聞琴 和伏武昌登孫權故城

夏始和劉潺陵 和宋記室省中

和王著作融八公山 和王主簿季哲怨情

和王主簿二首 同王主簿有所思

落日同江儀曹 和紀參軍服散得益

新治北窻和何從事 同羈夜集

卷第五

雜詩凡四十首

奉和隨王殿下十六首

詠風 詠竹

詠薔薇 詠蒲

詠兔絲 詠落梅

遊東堂詠桐 詠牆北梔子

同詠樂器三首 琴

琵琶 箎

同詠坐上器二首

烏皮隱几 竹檳榔盤

同詠坐上所見一物凡十一首

席二首 幔

簾

竹火籠二首

鏡臺

燈

燭

詠邯鄲故才人嫁為厮養卒婦

詠鷓鴣

聯句 凡七首

阻雪

還塗臨渚

紀功曹中園

閒坐

侍筵西堂落日望鄉

祀敬亭山春雨

往敬亭路中

謝眺集目錄終

謝眺集卷第一

直隸寧國府知府任丘黎晨校刊

賦

酬德賦 并序

右衛沈侯以冠世偉才眷予以國士以建武二年予將南
牧見贈五言予時病既以不堪蒞職又不獲復詩四年予
忝後朱方又致一首迫東偏寇亂良無暇日其夏還京師
且事讌言未遑篇章之思沈侯之麗藻天逸固難以報章
且欲申之賦頌得其盡體物之旨詩不云乎無言不酬無
德不報言既未敢為酬然所報者寡于德耳故稱之酬德
賦其辭曰

嗟夫四時游之代序六龍驚而不息輕蓋靡于駿奔玉衡
勞于拊翼嗟歲晏之豔歡曾陰默以悽惻玄武伏於重介
宛虹潛以自匿覽其物之用舍相羣芳之動植弔悴軀於
華省理衣簪而自救思披文而信道散奮滿於胸臆嗟民
生之知用知莫深于知己彼知己之爲深信懷之其何已
牽弱葛之蔓延寄陵風於松杞指曲蓬之直達固有憑於
原泉彼排虛與蹠實又相鳴於林岵興伐木於友生詠承
筐于君子矧景行之在斯方寄言于同耻求相仁于積習
寓神心于名理惟敦狎之旅歲實興齊之二六奉武運之
方昌覩休風之未淑龍樓儼而洞開梁邱煥其重複君奉
筆於帝儲我曳裾於皇穆藉風雲之化景申遊好於蘭菊

結德言而爲佩帶芳猷而爲服援雅範以自綏懿前修之
所■昔仲宣之發穎實中郎之倒屣及士衡之籍甚托壯
武之高義有杞梓之貞心協丹采之輝被伊吾人之陋薄
雖黼藻之何實惟風雅之未變知雲網之不廓譬曾棟之
將傾必萃棖之先落翳明離以上賓屬傳體於織萼周二
輝而分崩擠九鼎於重壑雖魚鳥之欲安駭風川而迴薄
微天道之布新嗟員首其馬託予窘迹以多媿塊離尤而
獨處君紆組於名邦貽話言於川渚悵分手於東津望徂
舟而延佇慮古今之爲隔豈山川之云阻賴先德之龍興
奉英靈之電舉事紫泥之密勿腰青綈而容與沾後惠以
竭來竟卒獲其咲語我艤舟以命徒將泊徂於南夏旣最

予以烟戒又引之以風雅若笙簧之在聽雖舒憂而可假
昔店病於章濱思繼歌而莫寫恩靈降之未已奉京粉而
作傳臨邦途之永陌懷予馬於騏驎望平津而出宿登崇
岡而興賦顧歸憶之南迴引行鑣而東驅何瓌才之博侈
申贈辭於萱樹指代匠而切俚比治素而引喻方含毫而
報章迫紛埃之東鶩釋末位以言歸忽乘驛以南赴連篇
章之莫訓欲寄言於往句類殺翮之難矯似洞源之不注
意搔搔以杼柚魂營營而馳騫爾腰戟於戎禁我拂劔於
郎闈願同車以日夜城望昏而掩扉時遊盤以未極睠落
景之徂輝若清顏之倏忽吝歡賞之多違排重闕一作而
休告知南館之有依驂職門以右轉僕望路其如歸忘清

漏之不緩借曉露之方晞聞夫君之東守地隱蓄而懷僊
登金華之問道得石室之名篇悟寰中之迫脅欲輕舉而
舍旃離寵辱於毀譽去天代於腥膻忽攜手以上征躋中
皇之脩迥巾帝車一作連之廣軾掉河舟一作洲之輕艇歷星
街之熠燿浮天潢之嬰瀛機九轉於玉漿練七明於神鼎
吹萬化而不喧度千春之可並齊天地於倏忽安事人間
之紆綈哉

思歸賦 并序

夫鑿之積也無厚而納窮神之照心之徑也有域而懷重
淵之深余少而薄遊身防方思俄然萬里晚自省諒非
一塗何則此後闕

余菲薄以固陋受靈恩而不訾施鍾黃之沃若剖金符之
陸離舟未濟而河廣途方遙而馬疲忽中寢而念厲魂申
旦而九移昔受教於君子逢知己之隆盼被名立之羽儀
沾宦成之藻緇羗服義而不怠豈臨岐而喻變勢方迅於
轉圓理好旋於奔電援弱葛而能升踐重岡而不眩信禔
福之井已寧悔禍其如見大明廓以高臨吹萬忻而同悅
跨神臯之沃衍奉英藩之睿哲承此屋一作之隆化踵芳
塵之餘烈懷齷齪之福心無夸毗之誕節竟伊鬱而不怡
賴遐討於先哲紛吾生之遊蕩彌一紀而歷茲自下車於
江海涉青春於是時睠重芒而引領望大夏而長思雖曲
街之委陋猶寤寐而見之況神交而通夢眇河漢於佳期

爾乃眷言薄暮南眺悠然方整歸轡願受一廛考華城之
直陌相洛浦之廻阡連飛薨於故友接閒館以懷僊臨南
塲以藝藿寄北地而采蓮睇微英之霍霍望水葉之田田
乃翦山木不日爲功非輪非奩去斲去龔夜索絢而繞繞
旦乘屋而芄芄竹櫺躋區而經北繩閉窈窕以臨東布茵
蕭於踈棹織莢亂於廻櫳于是籬挿芳槿門拂長楊園桃
春發窻竹夏涼晨露晞而草馥微風起而樹香無芬菲以
襲予空旖旎於都房恒離居以歲月庸銷落而徒傷我聞
時命有殖無遷徵事或在求理未甄譬豐草之區別隨霜
露而天延背萱鮮於堂北尚幽幽而未捐苟外物以能惑
亦在應而無騫况朝霞之采可嚙瓊扉之飾方宣養以虛

白之氣悟以無生之篇豈加璧之贈可動執珪之位能纏
歸來薄暮聊以永年

七夕賦

奉護軍
王命作

金祗司矩火曜方流素鐘登御夷律鳴秋朱光既夕涼雲
始浮盈多露之靄靄升明月之悠悠步廣階而延膝屬天
媛之淹留嗟斯靈之淑景招好仇於服箱邁姮娥而擢質
凌瑤華而擅芳厭白玉以爲飾霏丹霞而爲裳迴龍駕之
容裔亂鳳筦之凄鏘騰燭光於西極命二妃於瀟湘軾帝
車而捐玦凌天津而上翔悵漢渚之夕漲忻河廣之既梁
臨瑤席而宴語綿含睇而娥揚嗟蘭夜之難永泣會促而
怨長忌織阿之方駕吝長庚之末光撫鳴琴而脩况浩安

歌而自傷歌曰清絃愴兮桂觴酬雲幄靜兮香風浮龍鑊
蹠兮玉鸞整睠星河兮不可留分雙袂之一斷何四氣之
可周斯乃嚮像恍惚彷彿幽曖耳之無聞目之無續故鐘
鼓聞而延予隱白日沉而季後對豈形器之所求亦理將
其如昧君王壯思風飛冲情雲上顧楚詩而縱轡瞻蘭書
而競爽實研精之多暇聊餘日之駘蕩賦幽靈以去惑排
視聽而玄往晒陽雲於荆夢賦洛篇於陳想乃澄心而閒
邪庶綢繆於茲賞

高松賦

奉司徒竟
陵王教作

閱品物於幽記訪叢育於祕經巡汜林之珍望識斯松之
最靈提於巖以羣茂臨於水而宗生豈榆柳之比性指冥

椿而等齡若夫修幹垂陰喬柯飛穎望肅肅而既聞卽微
微而方靜懷風音而送聲當月露而留影旣芊眠於廣隰
亦迢遞於孤嶺集九僊之羽儀棲五鳳之光景固松木之
爲選貫山川而自永爾乃青春受謝雲物含明江臯綠草
曖然已平紛弱葉而凝照競新藻而抽英陵翠山而如剪
施懸蘿而共輕至於星迴窮紀沙鴈相飛同雲映其無色
陽光沉而滅暉卷風颺之吸歛積霰雪之嚴霏豈彫真於
歲暮不受令於霜威若乃體同器制質兼上才夏書稱其
岱畎周篇咏其徂徠乃屈已以弘用構大壯於雲臺幸爲
玩於君子留神心而顧懷君王乃徙讌蘭室解佩明椒塞
幽蘭於夕陰詠聳幹於琴朝陵高丘以致思御風景而道

遙夷黻冕之隆貴懷汾陽之寂寥邈道勝於千禩蘊神理
而自超夫江海之爲大實涓澮之所歸瞻衡恒之峻極不
讓壤於塵微嗟孤陋之無取幸聞道於清微理弱羽於九
萬愧不能兮奮飛

杜若賦

奉隨王教作時年
二十六於坐獻

憑瑤圃而宣游臨水木而延佇柳含色於遠岸泉鏡流於
枉渚蔭綠竹以淹留藉幽蘭而容與覽茲榮之悅茂紛爲
芳於清籟觀夫結根擢色發曜垂英綠春巒以織布蔭涼
潭而影清景奕奕以四照枝靡靡而葉傾冒霜蹊以獨蒨
當春郊而逕平蹇汀洲以企予懷石泉於幽情嗟中巖之
織草厠金芝於芳叢夕舒形於溽露旦發彩於春風承義

陽之光景庶無悲於轉蓬

野鷺賦

并序

有門人斃一野鷺因以爲獻予時命以登俎用待賓客客有愛其羽毛請予爲賦其詞曰

夫何羅人之伎巧薦江海之逸禽落摩天之迅羽絕歸飛之好音碎文錦之丹臆裂雕綺之翠襟孤雛驚以靡翼饑雌叫而莫尋越滄流以遠致乃交貿以兼金因閤寺以傳請排邃戶以重深貴敷衽以取愛願登俎以甘心

遊後園賦

積芳兮選木幽蘭兮翠竹上蕪蕪以蔭景下田田兮被谷左蕙畹兮彌望右芝原兮寫目山霞起而削成水積明以

經復於是敞風閨之藹藹聳雲館之茗茗周步欄以升降對玉堂之沈寥追夏德之方暮望秋清之始飈藉宴私而遊行時寤語而逍遙爾乃日樓榆柳霞照夕陽孤蟬以散去鳥成行惠氣湛兮帷殿肅清陰起兮池館涼陳象設兮以玉瑱粉蘭藉兮咀桂漿仰微塵兮美無度奉英軌兮式如璋藉高文兮清談預含毫兮握芳則觀海兮爲富乃游聖兮知方

臨楚江賦

爰自山南薄暮江潭滔滔積水裊裊霜嵐憂與憂兮竟無際客之行兮歲已嚴爾乃雲沉四岫風蕩中川馳波鬱素駭浪浮天明沙宿莽石路相懸於是霧隱行鴈霜眇虛林

迢迢落景萬里生陰列攢笳兮極浦弭蘭鷁兮江潭奉玉
樽之未暮食勝之芳音願光兮秋月庶永照於遺簪

擬宋玉風賦奉司徒
教作

起日域而搖落集桂宮而送清開翠帳之影藹響行珮之
輕鳴揚淮南之妙舞發齊后之妍聲下鴻池而蓮散上雀
爵一作臺而雲生至於新虹明歲高月照秋碎儀迺豫冲想
雲浮鄒馬之賓咸至申穆之醴已酬朝後登樓之詠夕引
小山之謳厭朱邱之沉遠思輕舉而遠游驩驩之馬魚躍
飄鑿車而水流此乃宋玉之盛風也若夫子雲寂寞叔夜
高張煙霞潤色荃蕙結芳出澗幽而泉列入山戶而松涼
眇神王於丘壑獨起遠於孤觴斯則幽人之風也

樂歌

雩祭歌八首

迎神

清明暢禮樂新候龍景選貞辰其陽律元陰晷伏耕下土
荐種稔其宸儀警王度宣瞻雲漢望旻天其張盛樂奏雲
舞集五精延帝祖其雲有諷榮有秩拒鬯芬圭瓚其靈
之來帝闈開車煜燿吹徘徊其停龍轡徧觀此凍雨飛祥
雲靡其壇可臨奠可歆對毗社鑒皇心

右八章章四句句三言

世祖武皇帝

濬哲維祖長發其武帝出自震重光御寓七德攸宣九疇

咸叙靜難荆衡凝威蠶浦其昧旦丕承夕惕刑政化一車
書德馨棗盛昭星夜景非雲曉慶衢室成陰璧水如鏡其
禮充玉帛樂被匏絃於鑠在詠陟配於天自宮祖兆靡愛
牲牲我將我享永祚豐年

右三章章八句句四言

青帝

營翼日鳥殷霄凝冰泮玄蟄昭其景陽陽風習習女夷歌
東皇集其真春酒秉青珪命田租渥羣黎

右三章章四句句三言

赤帝

惟此夏德德恢台兩龍在御炎精來其火景方中南譌秩

靡草云黃含桃實其族雲翳鬱温風扇興雨祁祁黍苗遍

右三章章二句句七言

黃帝

稟火自高明毓金挺剛克涼燠資成化羣芳載厚德其陽
季勾萌達炎徂溽暑融商暮百工止歲極凌陰冲其泉流
疏已清原隰甸已平咸言祚惟億敦民保高京

右三章章四句句五言

白帝

帝說于允執矩固斯藏百川收潦精景應金方其嘉樹離
披榆關命賓鳥夜月如霜金風方嫋嫋其商陰肅殺萬寶
咸亦適勞哉望歲場功異可收

右三章章二句句九言

黑帝

白日短玄夜深招搖轉移太陰霜鐘鳴冥陵起星迴天月
窮紀其聽嚴風來不息望玄雲黝無色曾冰裂積羽幽飛
雪至天山側其關梁閉方不巡合國吹饗蜡賓統微陽究
終始百禮洽萬祚臻

右三章章四句句六言

送神

敬如在禮將周神之駕不少留其躍龍鑿轉金蓋紛上馳
雲之外其警七曜詔八神排閭闔渡天津其有滄與膚寸
積雨冥冥又終夕其俾棲糧維萬箱皇情暢景命昌

右五章章四句句三言

詩四言

侍宴華光殿曲水奉敕為皇太子作

旁求遂古逖聽鴻名大寶曰位得一為貞朱梯叶祉綠宇
摘英升配同貫進讓殊聲

大橫將屬會昌已命國步中徂宸居膺慶璽劔先傳龜玉
增映宗堯有緒復禹無競

禮行郊社人神受職寶效山川鱗羽變色玄塞北靡丹微
南極浮毳駕風飛一作非泳登一作非陟

能官民秀利建天跼枵鶉列野營絳分區論思帝則獻納
宸樞麟趾方一作公定鵜翼誰濡

西京藹藹東都濟濟秋夜濯流春襖浮醴初吉云獻上除
方啓昔駕陽頻一作今帳雲陞

嘉樂舊矣芳宴在斯載留神矚有睟天儀龍精已映威仰
未移葉依黃鳥花落春池

高殿弘敞禁林稠密青磴崛起丹樓間出翠葆隨風金戈
動日惆悵清管徘徊輕佾

灞滙入筵河淇流昨海一作若來往觴肴公沂歡飫
終日一作有終清光欲莫輕貂回道一作首華組徐步登賢博望

獻賦清漳漢貳稱敏魏雨一作兩垂芳監撫有則七鬯無方
瞻言守器永愧元良

三日侍華光殿曲水宴代人應詔

羣分未辯類聚茲式天睠休明且求至德御繁實簡制動
惟默官府百王衣裳萬國

中葉遭閔副內多違悠悠靈貺爰有適歸於昭睿後撫運
天飛凝居中縣神動外畿

懸象著明離光乃位我有儲德徽猷淵備長壽察書龍樓
迴轡重道上庠行遵儒肆

朝陽有幹布葉萋萋思皇威矣鷓羽高棲出馳先輅入秉
介珪瞻秦望井建魯分奎

求賢每勞得士方逸有覺斯順無文咸秩萬箱惟重百鏹
載卹屈草戒諛階賞紀日

文教已肅武節旣馳榮光可照合璧如規載懷姑射尚想

瑤池濯龍乃飾天淵在斯

作樂順動實符時義上春初吉亦留淵寄紅樹巖舒青莎

一作蘊水被雕梁虹拖雲薨鳥跋

高懸甲帳周褰黼帷長筵列陛激水旋墀浮醪聚蟻靈蔡
呈姿河宗躍踢海介夔跣

弱腕纖腰遷延妙舞秦箏趙瑟殷勤促柱降席連綏稱觴
接武稽首萬年獻茲多祐

天地既成泉流既清薄暮沾幸屬奉文明將標齊配刻掃
秦京願馳龍漠飲馬懸旌

三日侍宴曲水代人應詔

神理內寂機象外融遺情汾水垂冕鴻宮樹以司牧匪我

求蒙徒勤日用誰契玄功

往晦必明來碩資蹇於皇克聖時乘御辯寶曆載暉瑤光
重踐昭昭舊物熙熙遷善

當宁日昃求衣未明抵壁焚翠銷劍隳城九疇式序三辟
再清虞箴罔闕矇奏傳聲

麗景則春儀方在震重聖積厚金式瓊潤天爵必諧王臣
咸蓋譬諸萃霍惟邦之鎮

正朔葱瀚冠冕邛越爭長明堂相超魏闕龜象南薦環裘
西發巢閣易窺馴庭難揪

上巳惟昔于彼襍流被穢河澣張樂春疇既停龍駕亦泛
鳧舟靈宮備矣無待茲遊

謝集
初鷲命曉朝霞

一作

開夜飾陸道源迴伊流灞極望天淵

曲阻亭榭閒館巖敞長廊水架

金觴搖蕩玉俎推移筵浮水豹席擾雲螭寥亮琴瑟嗷咷

塤簾歡茲廣讌穆穆天儀

周道如砥康衢載直徒愧玄黃負恩無力華轡徒駕長纓

未飾相彼失晨寧忘鼓翼

謝眺集卷第一終

謝眺集卷第二

雜曲

隋王鼓吹曲十首

元會曲

二儀啓昌曆三陽應慶期珪贄紛成序鞮譯憬來思分階
艸組練充庭羅翠旗觴流白日下吹溢一作景雲滋天儀
穆藻殿萬寓壽皇基

郊祀曲

六宗禋配岳五峙奠甘泉整蹕遊九闕清簫開八埏鏘鏘
玉鑿動溶溶金障旋郊宮光已屬升柴禮既虔福響靈一作
雲之集南岳固斯年

鈞天曲

高宴顛天臺置酒迎風觀笙鏞禮百神鍾石動雲漢瑤堂
琴瑟驚綺席舞衣散紫鳳來參差玄鶴至凌亂已慶明庭
樂誰想南風彈

入朝曲

江南佳麗地金陵帝王州逶迤帶綠水迢遞起朱樓飛甍
夾馳道垂楊蔭御溝凝笳翼高蓋疊鼓送華輶獻納雲臺
表功名良可收

出藩曲

雲枝紫薇內分組承明阿飛艤溯極浦旌節去關河眇眇
蒼山色沉沉寒水波饒音巴渝曲簫鼓盛唐歌夫君邁惟

德江漢仰清和

狡獵曲

凝霜冬十月殺盛涼颼開原澤曠千里騰騎紛往來平宜
望煙合烈火從風迴殪獸華容浦張樂荆山臺虞人昔有
諭明明時戒哉

從戎曲

選旅辭轅轅弭節赴河源日起霜戈照風迴連騎翻紅塵
朝夜合黃沙萬里昏寥戾清笳轉蕭條邊馬煩自勉輟耕
願征役去何言

送遠曲

北梁辭歡宴南浦送佳人方衢控龍馬平路騁朱輪瓊筵

妙舞絕桂席羽觴陳白雲丘陵遠山川時未因一爲清吹
激潺湲傷別巾

登山曲

天明開秀萼瀾光媚碧堤風盪飄鶯亂雲行芳柳低暮春
春服美遊駕凌丹梯升嶠旣小魯登巒且悵齊王孫尚游
衍蕙草正萋萋

泛水曲

玉露沾翠葉金風鳴素枝罷遊平樂苑泛鷁昆明池旌旗
散容裔簫管吹參差日晚厭遵渚採菱贈清漪百年如流
水寸心寧共知

同沈右率諸公賦鼓吹曲名

芳樹

早翫華池陰復鼓滄洲柹椅柅芳若斯歲蕤紛可繼霜下
桂枝銷怨與飛蓬逝不厠玉盤滋誰憐終委細

同前

沈約

發萼九華嶼開跗寒路側氤氳非一香參差多異色宿昔
寒飈舉摧殘不可識霜雪交橫至對之長歎息

同前

王融

相望早春日煙花雜如霧復此佳麗人含情一作結芳樹
綺羅已自憐萱風多有趣去來徘徊者佳人不可遇

當對酒

范雲

對酒心自足故人來共持方悅羅襟解誰念髮成絲徇性

良為達求名本自欺迨君當歌日及我傾樽時

臨高臺時為隋王文學

千里常思歸登臺瞻一作綺翼纔見孤鳥還未辯連山極

四面動清風朝夜起寒色誰知倦遊者嗟此故鄉憶

同前

沈約

高臺不可望望遠使人愁連山無斷絕河水復悠悠所思
暖何在洛陽南陌頭可望不可至何用解人憂

巫山高

彷彿巫山高薄暮陽臺曲煙雲乍舒卷猿鳥時斷續彼美
如可期寤言分在矚憮然坐相望秋風下庭綠

同前

范雲

巫山高不極白日隱光輝靄靄一作遙遙朝雲出一作去冥冥暮

雨歸巖懸獸無迹林暗鳥疑飛枕席竟誰薦相望空依依

同前

劉繪中書

高唐與巫山參差鬱相望灼爍在雲間氛氲出霞上散雨
收夕臺行雲卷晨帳本作障出沒不易期嬋娟似以似惆悵

有所思

劉繪

別離安可再而我更重之佳人不相見明月空在帷共銜
滿堂酌獨斂向隅眉中心亂如雪寧知有所思

同前

范雲

如何有所思而無相見時夙昔夢顏色階庭尋履基高歌

一作張更何已引滿終自持欲知憂能老為視鏡中絲

同賦雜曲名

陽春曲

檀秀才

青雲獻初歲白日映雕梁蘭萌猶自短柳葉未能長已見
花紅發復聞花葉香樂此試遊行誰知心獨傷

綠水曲

江朝請

塘上蒲欲齊汀洲杜將歇春心既易蕩春流豈難越桂棹
及晚風菱影映初月芳香若可贈為君步羅襪

採菱曲

陶功曹

朝日映蘭澤乘風入桂嶼棹影已流倡輕舟復容與勿遽
佳期移方追明月侶採採詎盈掬還望空延佇

白雪曲

朱孝廉

凝雲沒霄漢從風飛且散聯翩下幽谷徘徊依井幹既興
楚客謠亦動周王歎所恨輕寒早不待陽春旦

秋竹曲

時為宣城守

嬈娟綺窻北結根未參差從風既裊裊映日頗離離欲求
棗下吹別有江南枝但能凌白雪貞心蔭曲池

永明樂十首

帝圖閏九月皇風浮四溟永明一為樂咸池無復靈

其二

民和禮樂富世清歌頌徽鴻名軼卷領稱首邁垂衣

其三

朱臺鬱相望青槐紛馳道秋雲湛甘露春風散芝草

其四

龍樓日月照淄館風雲清儲光温似玉藩度式如瓊

其五

化洽鯤海君恩變龍庭長西北鷺環裘東南盡龜象

其六

出車長洲苑選旅朝夕川絡絡結雲騎奕奕泛戈船

其七

燕駟遊京洛趙服麗有輝清歌留上客妙舞送將歸

其八

實相薄五禮妙花開六塵明祥已玉燭寶瑞亦金輪

其九

生茂祥蘿性身與佳惠隆飛纓入華殿屣步出重宮

其十

彩鳳鳴朝陽玄鶴舞清商瑞此永明曲千載爲金皇

玉階怨

夕殿下珠簾流螢飛復息長夜縫羅衣思君此何極

金谷聚

渠碗送佳人玉杯邀上客車馬一東西別後思今夕

王孫遊

綠草蔓如絲雜樹紅英發無論君不歸君歸芳已歇

銅爵悲

落日高城上餘光入總帷寂寂深松晚寧知琴瑟悲

江上曲

易陽春草出踟躕日已暮蓮葉尚田田淇水不可渡願子
淹桂舟時同千里路千里既相許桂舟復容與江上可采
菱清歌共南楚

曲池之水

緩步遵莓渚披襟帶蕙風芙蓉舞輕帶包筍出芳叢浮雲
自西北江海思無窮鳥去能傳響見我綠琴中

同謝諮議詠銅爵臺

總惟飄井幹罇酒若平生鬱鬱西陵樹詎聞歌吹聲芳襟
染淚迹嬋娟空復情玉座猶寂寞況乃妾身輕

謝眺集卷第二終



